

Կ Ա Ր Ծ Ի Ք
ՊԱՇՏՈՆԱԿԱՆ ԸՆԴԴԻՄԱԽՈՍԻ

Էրիկ Մայիսի Գրիգորյանի՝ «Բնակչության ֆինանսական վարքագծի և ներդրումային որոշումների կայացման հիմնախնդիրները Հայաստանի Հանրապետությունում» թեմայով ատենախոսության վերաբերյալ ներկայացված Ը.00.03 - «Ֆինանսներ, հաշվապահական հաշվառում» մասնագիտությամբ տնտեսագիտության թեկնածուի գիտական աստիճանի հայցման համար

Ատենախոսության թեմայի արդիականությունը

Ատենախոսությունը նվիրված է ՀՀ-ում բնակչության ֆինանսական վարքագծի և ներդրումային որոշումների կայացման հիմնախնդիրների գիտական հետազոտությանը և դրա վերաբերյալ արդյունքների և նոր մոտեցումների ներկայացմանը: Ատենախոսության թեման չափազանց արդիական է և հայ հեղինակների կողմից ոչ բավարար հետազոտված: Վարքագծային ֆինանսների նկատմամբ ԱՄՆ-ի, իսկ այնուհետև միջազգային գիտական հանրության աճող ուշադրությունը թերևս պայմանավորված է այն հանգամանքով, որ 20-րդ դարի 80-ական թվականներից ֆինանսական շուկաների բուռն զարգացումը ուղեկցվեց շուկայական անոմոլիաների և ծախսողումների կտրուկ աճով: Ավանդական ֆինանսական տեսությունների համար լուրջ փորձություն էր նաև 2008-2009 թթ. գլոբալ ռեցեսիան և 2020 թվականի համավարակի շուկր, որի ֆինանսական հետևանքները չհաջողվեց կանխատեսել: Վարքագծային ֆինանսների ուսումնասիրությունը գիտամեթոդական տեսանկյունից ավելի է կարևորվում վարքագծային ֆինանսների զարգացմանը նպաստելու համար Նոբելյան մրցանակի արժանացած մի շարք տնտեսագետների ֆոնին: Մյուս կողմից՝ կայուն գների մակարդակի ապահովում, աղքատության հաղթահարում, գործազրկության մակարդակի կրճատում հիմնախնդիրների լուծման նպատակով առաջ է գալիս բնակչության ֆինանսական վարքագծի ուսումնասիրության անհրաժեշտություն, որի միջոցով հնարավոր կլինի գնահատել ներդրումային որոշումների կայացման ռացիոնալությունը կամ իռացիոնալությունը, արդյունքում էլ՝ նպաստել հուզականության հիման վրա ընդունված որոշումների պատճառով առաջացած վնասների կրճատմանը: Հաշվի առնելով այն փաստը, որ ՀՀ-ում բնակչության ֆինանսական վարքագծի ու ներդրումային որոշումների կայացման հիմնախնդիրները բավարար խորությամբ հետազոտված չեն՝ բազմակողմանի հետազոտություն իրականացնելու և վերջինի

արդյունքները գնահատելու օբյեկտիվ անհրաժեշտություն է առաջանում ինչպես գիտամեթոդական, այնպես էլ գործնական մակարդակներում: Վերջինը կարող է նպաստել ՀՀ-ում ֆինանսական գրագիտության բարձրացմանը, ֆինանսական վարքագծի, առաջացող ռիսկերի և հնարավորությունների գնահատման և կառավարման բարելավմանը: Դրանց շնորհիվ բնակչությունը կարող է առավել արդյունավետ կառավարել իր ֆինանսական հոսքերը, ինչը, իր հերթին, կարող է ազդեցություն ունենալ ամբողջ տնտեսության վրա: Նշվածը միանշանակորեն ընդգծում է ուսումնասիրության թեմայի արդիականությունը և հետազոտության անհրաժեշտությունը:

Ատենախոսության նպատակն ու խնդիրները

Հեղինակի կողմից, որպես հետազոտության հիմնական նպատակ է դրվել բացահայտել ՀՀ բնակչության ֆինանսական վարքագծի, ներդրումային որոշումների կայացման և դրանց հետ առնչվող հիմնախնդիրները, դրանց վրա ազդող գործոնների միջև կապերի, օրինաչափությունների ու դրսևորումների գնահատման հիման վրա մշակել և առաջարկել ֆինանսական վարքագծի բարելավման ուղիների գիտականորեն հիմնավորված մոտեցումներ, որին հասնելու համար առաջ են քաշվել հետևյալ խնդիրները.

- բացահայտել վարքագծային ֆինանսների էությունը, կապն ավանդական ֆինանսների հետ,
- հավաքագրել, մշակել և ամփոփել բնակչության ֆինանսական վարքագծի և ներդրումային որոշումների կայացման վերաբերյալ վիճակագրական ցուցանիշներ և այլ տվյալներ,
- վիճակագրական ցուցանիշների և մոդելների օգնությամբ գնահատել ավանդների ներդրման վարքագիծը որոշող սոցիալ-տնտեսական և շուկայական գործոնների ազդեցությունը,
- վիճակագրական ցուցանիշների և մոդելների օգնությամբ գնահատել վարկավորման վարքագիծը որոշող սոցիալ-տնտեսական և շուկայական գործոնների ազդեցությունը,
- գնահատել ֆինանսական վարքագիծը որոշող վարքագծային գործոնների ազդեցությունը,

- բացահայտել բնակչության ֆինանսական վարքագծին առնչվող առկա հիմնախնդիրները, հետազոտության հիման վրա մշակել ֆինանսական վարքագծի բարելավման ուղիների մոտեցումներ:

Ատենախոսության կառուցվածքը և հիմնական բովանդակությունը

Ատենախոսությունը բաղկացած է ներածությունից, երեք գլխից, եզրակացությունից, օգտագործված գրականության ցանկից և հավելվածից: Ատենախոսությունը շարադրված է 116 էջի վրա (առանց հավելվածի):

Ներածությունում հիմնավորվել են ատենախոսության հրատապությունը և արդիականությունը, սահմանվել են նպատակն ու խնդիրները, ներկայացվել ուսումնասիրության առարկան և օբյեկտը, օգտագործված տեղեկատվության աղբյուրները, ստացված գիտական արդյունքներն ու դրանց գործնական կիրառությունը:

Ատենախոսության առաջին՝ «Վարքագծային ֆինանսների էությունն ու տեսամթերոդական հիմքերը» գլխում հեղինակի կողմից ներկայացվել են հիմնականում արևմտյան ժամանակակից ֆինանսների գրականությունում առկա վարքագծային ֆինանսների վերաբերյալ սահմանումներն ու ձևակերպումները: Տվյալ գլխում մասնագիտական գրականության ուսումնասիրության հիման վրա ներկայացվել է նաև վարքագծային ֆինանսների և ֆինանսների ավանդական տեսության համեմատական վերլուծությունը, որից հետո՝ ներդրումային որոշումների կայացումը հոգեբանական գործոնների ազդեցության համատեքստում: Այս գլխում գիտական նորույթ չի ձևավորվել և չի հիմնավորվել:

Ատենախոսության երկրորդ՝ «ՀՀ ռեզիդենտ տնային տնտեսությունների ավանդների ներդրման ու վարկավորման վարքագծի վերլուծությունը» գլխում նախ թեմային առնչվող բավականին հարուստ վիճակագրական ցուցանիշների ներկայացման և վերլուծության միջոցով հեղինակը նկարագրել է ՀՀ բնակչության սպառողական, ավանդների ներդրման, վարկավորման վարքագծերը: Այնուհետև՝ գնահատել է սոցիալ-տնտեսական և շուկայական գործոնների, այդ թվում՝ ՍԳԻ-ի, միջին ամսական անվանական աշխատավարձի, շուկայական տոկոսադրույքի, ԱՄՆ դոլարի փոխարժեքի, պետական միջնաժամկետ պարտատոմսերի եկամտաբերության ազդեցությունը և ուղղությունը նախ՝ բնակչության ավանդների ներդրման, ապա՝ վարկավորման վարքագծի

դեպքում: Այս գլխում ատենախոսի կողմից ձևակերպված գիտական նորույթների առաջին և երկրորդ կետերն են ամփոփված:

Ատենախոսության երրորդ՝ «ՀՀ բնակչության ֆինանսական վարքագծի բարելավման ուղիները» գլխի շրջանակում քննարկվել են արտասահմանյան և հայկական որոշ էմպիրիկ հետազոտություններ, վերլուծվել և ամփոփ ներկայացվել են ՀՀ բնակչության շրջանում անցկացված հարցման արդյունքները, դրա հիման վրա գնահատվել են բնակչության ֆինանսական վարքագիծը, ֆինանսական բավարարվածությունը, ֆինանսական սթրեսը, ֆինանսական գրագիտությունը: Երրորդ ենթագլխում հեղինակը հետազոտության հիման վրա առաջ է քաշել ՀՀ-ում բնակչության ֆինանսական վարքագծի բարելավման մոտեցումներ: Այս գլխում են տեղ գտել ատենախոսի կողմից ներկայացված երրորդ և չորրորդ գիտական նորույթների հեղինակային հիմնավորումները:

«Եզրակացություն» բաժնում ամփոփվել և համառոտ ներկայացվել են հետազոտության հիմնական եզրակացությունները:

Ատենախոսության ստացված արդյունքների հավաստիությունն ու դրանց գործնական նշանակությունը

Տեսություններն ու մոտեցումները, որոնք տեղ են գտել ատենախոսությունում, կարող են օգտակար լինել վարքագծային ֆինանսների դասավանդման ժամանակ և դրա վերաբերյալ հետազոտություններ իրականացնելիս: Ստացված արդյունքները գործնականում օգտակար կարող են լինել բնակչությանը՝ սեփական ֆինանսական ռեսուրսներն առավել արդյունավետ օգտագործելու, ֆինանսական ինստիտուտներին՝ հատկապես առավել արդյունավետ փաթեթային կառավարում իրականացնելու համար, պետական տնտեսական քաղաքականություն մշակողներին:

Ատենախոսության գիտական արդյունքները և նորույթը

Ատենախոսությունում հեղինակը ներկայացնում է մի շարք արդյունքներ, որոնցից որպես գիտական նորույթ առանձնացնում է հետևյալ չորս կետերը.

- ավանդային ներդրումների վարքագծի վերլուծությամբ հստակեցվել և

գնահատվել են ՀՀ տնային տնտեսությունների խնայողության վարքագծի և ավանդների վրա ազդող գործոնները, այդ թվում՝ միջին ամսական անվանական աշխատավարձ, սպառողական գների ինդեքս, պաշտոնապես գրանցված գործազուրկների թիվ, ԱՄՆ դոլարի փոխարժեք, շուկայական տոկոսադրույք, ցույց է տրվել դրանց միջև կապի ուղղությունն ու բնույթը,

- վարկավորման վարքագծի վերլուծությամբ հստակեցվել և գնահատվել են ՀՀ տնային տնտեսությունների վարկերի վրա ազդող վերը նշված գործոնները, ցույց է տրվել դրանց միջև կապի ուղղությունն ու բնույթը,

- գնահատվել են ՀՀ-ում ֆինանսական գրագիտության, ֆինանսական սթրեսի և ֆինանսական բավարարվածության ազդեցությունը ֆինանսական վարքագծի վրա, նշված գործոնների միջև կապի ուղղությունն ու բնույթը,

- հետազոտվել և հիմնավորվել են ՀՀ-ում բնակչության ֆինանսական վարքագծի և ներդրումային որոշումների կապը սոցիալ-տնտեսական տարբեր հիմնախնդիրների հետ, բացահայտվել կապի բնույթը, մշակվել և առաջադրվել են մոտեցումներ, որոնք կարող են նպաստել ներդրումային և ֆինանսական վարքագծի բարելավմանը սոցիալ-տնտեսական, գիտակրթական, ֆինանսական-ներդրումային ոլորտներում:

Դիտողություններ ատենախոսության վերաբերյալ

Ներկայացված ատենախոսությունը գերծ չէ նաև որոշակի թերություններից, որոնք թեն ատենախոսության գիտական արդյունքների և արժանիքներ վրա էական ազդեցություն չեն ունենում, սակայն ցանկալի է, որ հեղինակի կողմից հաշվի առնվեն հիմնականում հետագա գիտական աշխատանքների շրջանակներում: Մասնավորապես.

- Ատենախոսության մեջ խոսելով բնակչության խնայողություններից, հեղինակը դրանք ուսումնասիրում է հիմք ընդունելով առևտրային բանկերում տնային տնտեսությունների ավանդները և վարկավորման ծավալները: Սակայն մեր երկրի բնակչության խնայողությունների մեջ զգալի տեսակարար կշիռ է կազմում նաև կանխիկ փողի (ինչպես ՀՀ դրամով այնպես էլ արտարժույթով), թանկարժեք մետաղների, անշարժ և շարժական գույքի տեսքով խնայողությունները: Իհարկե, նշված ուղղություններից ոչ բոլորի համար են առկա որակյալ վիճակագրական

տվյալներ՝ գիտականորեն արժեքավոր և հիմնավոր եզրահանգումներ կատարելու համար, սակայն աշխատանքը կշահեր եթե հեղինակն անդրադարձ կատարեր նաև նշվածներին:

- Ատենախոսության երկրորդ գլխում հեղինակը էկոնոմետրիկ վերլուծության միջոցով գնահատել է ՀՀ ռեզիդենտ տնային տնտեսությունների կողմից ավանդների ներդրման վարքագծի վրա սոցիալ-տնտեսական և շուկայական գործոնների ազդեցությունը, չափն ու դրա ուղղությունը կարճաժամկետում և երկարաժամկետում: Մոդելները կառուցվել են ամսական ցուցանիշների հիման վրա և ընդգրկել են 2009-2020թթ. միջակայքը: ՀՀ վերաբերյալ իրականացված հետազոտությունների փորձը ցույց է տվել, որ Հայաստանի տնտեսական ցուցանիշներին առընչվող էմպիրիկ գնահատումների համար առավել նպատակահարմար է օգտագործել եռամսյակային ժամանակագրական շարքեր քանի որ դրանք առավել երկար ժամանակային միջակայքի համար են հասանելի, ինչպես նաև առավել լավ են արտացոլում ցուցանիշների վարքագիծը Միևնույն ժամանակ, աշխատանքը կշահեր եթե առկա վիճակագրական ցուցանիշների անբավարարությունը հաշվի առնելով հեղինակը վերլուծեր նաև այլ երկրների համապատասխան ցուցանիշները:

ԵԶՐԱԿԱՑՈՒԹՅՈՒՆ

Վերը ներկայացված դիտողությունները չեն նսեմացնում ատենախոսության գիտական արժանիքները և ստացված արդյունքների կիրառականությունը, և հիմնականում նպատակ ունեն բարելավելու և ուղղորդելու հեղինակին հետագա գիտական ուսումնասիրությունների ժամանակ:

Ատենախոսությունը աչքի է ընկնում իր դրական արժանիքներով, կատարված ինքնուրույն հետազոտություն, վերլուծված են տեղեկատվական բազմաթիվ աղբյուրներ ուսումնասիրված են բնակչության ֆինանսական վարքագծի և ներդրումային որոշումները կայացման վերաբերյալ տեսական մոտեցումներ, դրանց հիման վրա ներկայացված են կարևոր արդյունքներ: Ատենախոսությունը համապատասխանում է թեկնածուական ատենախոսությունների ձևավորման նկատմամբ սահմանված պահանջներին Ատենախոսությունը կարելի է որակել որպես բնակչության ֆինանսական վարքագծ

կարևոր հիմնախնդիրների հաջողված գիտական հետազոտություն, որի արդյունքում ձևավորվել են գիտական նորույթ պարունակող մոտեցումներ:

Ներկայացված սեղմագիրը համապատասխանում է ատենախոսության բովանդակությանը և արտացոլում է դրա հիմնական դրույթներն ու արդյունքները:

Սեղմագրում ներկայացված 6 հոդվածները հրատարակված են ԲՈԿ-ի կողմից ընդունելի պարբերականներում: Դրանք արտացոլում են ատենախոսության հիմնական բովանդակությունը, նաև որպես գիտական նորույթ հեղինակի կողմից ներկայացված մոտեցումները:

Եզրակացնելով նշենք, որ Էրիկ Մայիսի Գրիգորյանի՝ «Բնակչության ֆինանսական վարքագծի և ներդրումային որոշումների կայացման հիմնախնդիրները Հայաստանի Հանրապետությունում» թեմայով ատենախոսությունը համապատասխանում է ՀՀ ԲՈԿ-ի «ՀՀ-ում գիտական աստիճանաշնորհման կանոնակարգի» 6-րդ և 7-րդ կետերի պահանջներին, և հեղինակն արժանի է Ը.00.03 - «Ֆինանսներ, հաշվապահական հաշվառում» մասնագիտության գծով տնտեսագիտության թեկնածուի հայցվող գիտական աստիճանի շնորհմանը:

**Պաշտոնական ընդդիմախոս՝
տնտեսագիտության թեկնածու**

**Հ. Ի. Բեջանյանի ստորագրության
իսկությունը հաստատում եմ
ՀՊՏՀ-ի գիտական քարտուղար՝**



Հ. Ի. Բեջանյան
27 հունիսի 2022 թ.



Ս. Տ. Դարբինյան
27 հունիսի 2022 թ.